

Malaysia import makanan RM221.81b

KUALA LUMPUR 25 Jun - Malaysia mengimport bahan makanan bernilai RM221.81 bilion sejak 10 tahun lepas.

Timbalan Menteri Pertanian dan Industri Asas Tani, Datuk Mohd. Johari Baharum berkata, kebanyakan komoditi yang diimport tidak ekonomik untuk dihasilkan dalam negara kerana kos pengeluaran tinggi di samping iklim yang tidak sesuai.

"Kumpulan komoditi makanan yang diimport adalah keluaran bahan makanan diproses, bahan makanan ternakan, buahan iklim sederhana, sayur-sayuran dan bijirin.

"Antara makanan yang kita import ialah koko, kopi, teh, susu, gandum, epal, oren, ubi kentang,



MOHD. JOHARI



SITI MARIAH

salad, beras dan tepung," katanya ketika menjawab soalan **Dr. Siti Mariah Mahmud (Pas-Kota Raja)**.

Siti Mariah bertanya, apakah jenis dan nilai bahan makanan diimport Malaysia dalam tempoh 10 tahun serta strategi kerajaan bagi memastikan jaminan makanan dan

mencapai tahap sara diri.

Mohd. Johari berkata, bagi memastikan jaminan makanan, kerajaan melaksanakan beberapa projek impak besar antaranya Taman Kekal Pengeluaran Makanan, Zon Industri Akuakultur, Pusat Fidlot Nasional, ladang kontrak, pembangunan usahawan asas tani dan "Entry Point Project" di bawah Bidang Ekonomi Utama Negara.

"Penyelidikan dan pembangunan ditumpukan kepada peningkatan pengeluaran hasil mampan antaranya penumpuan terhadap bidang pembangunan varieti dan baka, pengeluaran benih, bioteknologi dan kaji penyakit.

"Kerajaan juga akan terus mem-

bangun sistem rantaian bekalan makanan yang lebih terangkum dan kukuh melibatkan kerajaan, swasta, petani, penternak dan nelayan bagi menghubungkan pengeluaran dan permintaan pasaran," katanya.

Beliau berkata, usaha meningkatkan pengeluaran makanan memerlukan penglibatan aktif pihak swasta dan bagi menggalakkan pihak itu terus melabur, insentif fiskal dicadangkan untuk diperluaskan meliputi semua aktiviti pengeluaran dan pemprosesan.

"Pinjaman mudah yang mencukupi akan disediakan melalui Agrobank dan TEKUN, akses kepada pembiayaan juga akan diperbaiki," katanya.